

02. oktober 2015

UKA 2015/148

Uunga siunnersuut: Suliffissarsiuussinermut, ilitsersuinermut piginnaangorsaanermullu sullissiviit pillugit Inatsisartut inatsisaat nr. xx, yy 2015.

(Inuussutissarsiornermut, Suliffeqarnermut Niuernermut Nunanullu Allanut Naalakkersuisoq)

Siumumiit aalajangiiffigisassatut siunnersuummut imaattumik oqaaseqaateqassuugut:

Aalajangiiffissatut siunnersuutimi anguniarneqarpoq kommuunini tamani suliffissanut, ilitsersuisarnermut pikkorissaqqinnernullu qitiusumik ingerlatsivinnik pilersitsissoqassasoq.

Ullumikkut kommunit sisamaasut ingerlatsinermi assigiinngitsumik aqqissuussaapput, kommunit akornanniinnaangitsoq, aammali kommunip nammineq killeqarfiisa iluini, taamaasilluni allaffissornikkut assigiisaakkamik ingerlatsineq ajornakusoortinneqartoq Suliffeqarnermut Siunnersuisoqatigiit, kiisalu Suliniut nr. 2-mi suleqatigiissitaq, Naalakkersuisut pitsaanerusumik suliffissaqartitsinissamik anguniagaanni naliliisoqarpoq.

Siumumiit maluginiarparput Suliffeqarnermut Siunnersioqatigiit naliliinerini oqaatigineqarmat ullumikkut kommuunit aqqissugaanerini ingerlatsiviusut innuttaasut pisariaqartitaat naapertorlugit siunnersorneqarnissaat, pisariaqartumillu ikiorneqarnissaat isumannaartanngikkaat, tamannalu aaqqiiviginiarlugu qaninnerusumik kivitseqatigiiffiusumik sulineq ingerlanneqarpat innuttaasunut iluaqutaanerusumik sulisoqalissasoq.

Pingaarteqarpoq suliniuteqarnermi sapinngisamik innuttaasut pitsaanerusumik kiffartuunneqarsinnaanerisa anguniartuarnissaat, taamaattullu sapinngisamik sukkanerusumik innuttaasut pisariaqartitaannik siunnersorneqartarnissaat taamaasilluni sukkanerusumik suliffeqaqqilerlutik nammineq pilersorsinnaallutik inuiaqatigiittut tamatsinnut namminermullu iluaqusiisumik inuuneqalersinnaaqqullugit.

Piareersarfiit Suliffissarsiuussisarfiillu ataatsimoortinneqarnerisut marloqiusamik sulineq unitsillugu allaffissornikkut eqaanerusumik ingerlalnissaanik suliniuteqarneq Siumumiit nuannaarutigaarput taamatuttaaq sulisuusunik ilinniartitsineq pitsaanerusoq ingerlanneqarsinnaaqqullugu.

Siumumi pingaartipparput kommuunit oqartussaaffii ataqquilluinnarlugillu, taamaattumik sapinngisamik kiffaangissuseqarfigisaannik annikillileriffiunngitsumik suleqatigiinneq kiffaartuussinermullu isumaqatigiissuteqarnerit pitsaasumik innuttaasunut kinguneqartitsiviusumik sulisoqassasoq kaammattuutigissavarput.

Siumup anguniagaani ima allassimasoqarpoq:

Issuaaneq aallartippoq: *“Kikkulluunniit suliffissaarunnermik eqqugaasut piaarnerpaamik ilinniaqqinnissamik imaluunniit suliffissamik innersuunneqartassapput, piumasaat sapinngisaallu naapertorlugit. Piaarnerpaamik suliffeqaqqilernissaq anguniarlu pisariaqarluinnarpoq suliffissaaleqisut pikkorissarnissaat suliffissanullu allanut nutaanut nuussinnaannermut piukkunnarsarneqarnissaat.*”

Inuit kikkulluunniit suliffissaaleqillutik arlaatigullu pissuteqarlutik ingerlariaqqinngitsoortartut sulilerteqqinnissaat siunertaralugu kaammattorneqartarnissaat piaartumik suliniutigineqassaaq". Issuaaneq naavoq.

Taamaattumik suleriaatsit imminnut aporaattut iliuseqarfigisariaqarmata taamatullu suliffissaleqisut aamma inuusuttut suli suliffeqarnermut ikaarsaariarsimanngitsut pilersaarusiunneqarsinnaaqullugit naleqqussaasoqarnissaa Siumumiit taperseratsigu oqaatigissavarput, Inuussutissarsiornermut Ataatsimiititaliamut ingerlatinneqarnissaa innersuussutigalugu.

Suka K Frederiksen, Siumut